

Parke Nos Gran Dama a clausura temporada riba dia di Tres Rey



Como tradicion na Aruba den luna di december diferente casnan ta wordo decora pa asina crea un ambiente unico den temporada di Pasco.

Un di e casnan cu a bira masha popular ta e cas na Jan Flemming 6 di Doña Maca (q.e.p.d) y Benny Flanegin. December 2014 e cas aki pa prome biaha a wordo converti den un parke pa publico bou di e number "Parke Nos Gran Dama" rindiendo honor na Sra. Maca Flanegin (q.e.p.d).

Den 2015 famia Flanegin a bini hunto un biaha mas y a dicidi cu lo sigui cu e idea mirando e gran acogida cu esaki a haya den Pueblo. Por lo menos 30 miembro di famia y amistadnan ta e Team cu ta encarga cu esaki.

Un di e sobrinanan di Benny esta "Kathy" Peña ta e motor y creador di e obra mientras cada miembro tin oportunidad di sea verf of traha riba un parti di e obra destina pa su

persona pa asina hunto logra produci e producto final cual porcientu December 2015 tabata espectacular. Desde October preparacionnan a inicia cu e tema basa riba sneeuw pa cu temporada di fin di aña den un fantasia pa trece sneeuw Aruba den combinacion cu e simbolonan cu ta representa e temporada di Pasco. Tur e ideanan aki hunto a culmina den e number pa e obra esta "Welcome to Frosty Benny Home", manteniendo e number di Benny Flanegin central y intacto.

E parti di arte y imaginacion a wordo crea practicamente cu materialnan di reciclahe. Un Igloo, Mushroom City, 12 bala di sneeuw ilumina, E Rosario y un Angel representando e parti religioso tur a wordo traha y forma di materialnan plastico. Kerstboomnan di un aña anterior cu a wordo colecta a wordo gevef blanco decora den ambiente di Pasco. E "Smiley Christmas Light" a representa e alegria cu famia Flanegin y amistadnan kier transmiti na e publico. Finalmente

pa por a combina e cas cu e tema a scoge pa converti e cas completamente den "winterfrost" pintando un total di 13 dibuhoonan clasico di Pasco. Asina tabata tin pinta Benny Flanegin den caricatura, Rasta Claus, Snowman, Kerstboom, Virgen Maria, Niño Hesus pa menciona algun. Luznan blanco y blauw a refleha combinacion di

sneeuw y Shelo. E parti di Shelo ta pa recorda un persona hopi stima di famia kende for di shelo ta apreciando e obra dunando henter famia energia positivo. Parke Nos Gran Dama tin como mision pa crea un atmosfera social positivo, estimulando e cooperacion di boluntarianan y tambe comerciantenan cu ta sostiene e proyecto. Idea no ta solamente e atraccion di Luz pero promove e union familiar Paz y Harmonia unda famianan ta bin hunto pa saca potret y comparti momentonan bunita.

Asina dia di Tres Rey bou ritmo di Badu Band e publico por a baila y gosa den e parke Nos Gran Dama unda finalmente Mindo Croes di Mindo Tire Shop kende a sponsor e pagara hunto cu Endy Croes tabata tin e honor pa cende e pagara prome cu a bay over na paga e luznan di e bunita parke indicando final di un temporada hopi dushi. Organizacion Parke Nos Gran Dama kier a gradici un y tur mandando un Bendicion pa tur cu a aporta pa

haci esaki un realidad y mas cu claro pa henter e pueblo di Aruba. Tema pa December 2016 ya ta cla y lo carga e number "Christmas Village" den un estilo di Aruba di Antaño. Di curason den number di famia Flanegin y amistadnan masha masha Danki. □

